

**Nunatsinni Nakorsaaneqarfiup sulinera pillugu Namminersorlutik Oqartussat  
nalunaarutaat nr. 7 15. juni 2017-imeersoq**

Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27, 18. november 2010-meersumi aammalu Inatsisartut inatsisaatigut nr. 2, 29. maj 2012-imeersukkut allanngortinneqartumi § 9, imm. 1-imit 4-mut aammalu § 11a, imm. 2 naapertorlugit aalajangersarneqarpoq:

*Allaffissornikkut aqutsinermi pissutsit*

**§ 1.** Nunatsinni Nakorsaaneqarfik nuna tamakkerlugu atorfeqarfiuvoq nalunaarut una naapertorlugu suliassanik ingerlataqarfinillu isumaginnittuusoq.

**§ 2.** Naalackersuisut Nunatta Nakorsaananerani atorfinitsitsisuussapput.

*Imm. 2.* Nunatta Nakorsaananera missingersuutit aqutsinerlu eqqarsaatigalugit atorfeqarfimmut taassumalu ingerlanneqarneranut akisussaasuvoq, tassungalu ilanngullugu atorfeqarfimmi sulisunut atatillugu nunap nakorsaananera suliatigut aqutsinikkullu pisortatut piginnaatitaaffeqarpoq.

*Nunatsinni Nakorsaaneqarfiup nalinginnaasumik suliassai pillugit*

**§ 3.** Nunatsinni Nakorsaaneqarfiup nunami peqqissuseq malinnaaffigissavaa, atorfeqarfiullu innuttaasut peqqissusaannut sunniuteqartussat ineriartorneri malinnaaffigissavai.

*Imm. 2.* Nunatsinni Nakorsaaneqarfiup peqqinnissaqarfinni unioqqutitsisoqarsimasoq imaluunniit peqqinnissaqarfiup iluani amigaateqartoqartoq paasiguniuk nunami pisortaqaarfiit susassaqaarfartut ilisimatissavai, taamalu pisortanut pitsanngorsaatisat pillugit siunnersuuteqassalluni.

**§ 4.** Nunatsinni Nakorsaaneqarfiup Peqqissutsimut Naalackersuisoq suliat peqqinnissamut tunngassuteqartut pillugit siunnersortassavaa, atorfeqarfittut nammineerluni siunnersuisarnermigut imaluunniit Peqqissutsimut Naalackersuisumit qinnuigineqaruni. Nunatsinni Nakorsaaneqarfiup peqqinnissamut atatillugu suliniutini amigaatit pillugit maluginiagassanik ilisimatittassavaa aammalu pitsanngorsaatisanik siunnersuuteqartassalluni.

*Imm. 2.* Nunatsinni Nakorsaaneqarfiup pisortaqaarfiit allat suliani peqqinnissamut tunngassutilinni siunnersortaaffigai.

**§ 5.** Pisariaqartillugu Nunatsinni Nakorsaaneqarfiup Peqqissutsimut Naalackersuisoq peqqinnissamut tunngassutilinni inatsisissanik suliaqarnerani ikiortassavaa.

*Imm. 2.* Nunatsinni Nakorsaaneqarfik peqqinnissamut tunngassutilinni suliaqartut peqqissaanikkut maleruagassiornermi suliaqartassaaq.

§ 6. Nunatsinni Nakorsaaneqarfiup peqqinnissamut attuumassuteqartunik pingaarutilinnik pisoqartillugu inuiaqatigiit ilisimatittassavai, taamaalilluni innuttaasut peqqissusaannut akornusiisinnaasunut illersorniarumallugit, soorlu tunillaattartunik nappaateqartoqartillugu / nunarsuarmilu siammaattumik nappaalasoqartillugu, avatangiisini peqqissutsimut akornutaasinnaasunik ajornartorsiortoqartillugu, inuussutissat aqputigalugit nappaalasoqartillugu, imeqarfiit uumasullu inunntut tunillaassuuttunik nappaateqartillugit, allanillu pisoqartillugu innuttaasut ilaasaluunniit peqqissusaannut navianaateqarsinnaasunik.

#### *Peqqinnissaqarfimmi sulisorisanik nakkutilliineq*

§ 7. Nunatsinni Nakorsaaneqarfiup peqqinnissamik suliaqarnermut tunngasut peqqinnissaqarfimmi sulisorisanit suliffigineqartut tamaasa nakkutigisarai.

*Imm. 2.* Nunatsinni Nakorsaaneqarfiup peqqinnissaqarfiup avataani peqqinnissaq pillugu ilinniarsimasutut sulisut aammalu peqqissaanermik avataanni suliaqarfiit namminersortut tamaasa nakkutigisarai.

§ 8. Nunatsinni Nakorsaaneqarfiup peqqinnissamik suliaqarfiit, peqqinnissamik suliaqartut iluani ilinniagaqarsimasunit immikkut inatsisitigut akuerisaasumik pisinnaatinneqartunit suliffigineqartut, nakkutigisarai.

*Imm. 2.* Nunatsinni Nakorsaaneqarfiup aamma peqqinnissamik suliaqarnermut tunngasut sulisorisanit peqqinnissamik tunngassutilinnik ilinniarsimasunit akuersissummik peqanngitsunit suliarineqartut nakkutigisarai.

§ 9. Nunatsinni Nakorsaaneqarfiup peqqinnissaqarfimmi peqqinnissakkut sulisorisat peqqusinnaavai peqqinnissaqarfimmi sulisorisat suliaannut tunngatillugu Nunatsinni Nakorsaaneqarfimmut unnerluutiginnillutillu nalunaaruteqartaqqullugit.

§ 10. Akuersissummik peqanngikkaluarlutik peqqissaanermik katsorsaanermillu ingerlataqartutut pasitsaanneqarpata Nakorsaaneqarfiup pillugu inatsimmi kapitali 6 nakorsaanaatit katsorsaaniartunut tunngasoq unioqputillugu ingerlatsisut Nunap Nakorsaaneqarfiup nalilersuiffigissavai.

#### *Suliffeqarfiit nakkutigineqarneri*

§ 11. Nunatsinni Nakorsaaneqarfiup Peqqinnissaqarfiup angerlarsimaffiutaani pissutsit peqqinnissamut tunngassutilinnik suliaqarfiusut tamaasa, tamatumunnga ilanngullugit katsorsaaneq nalinginnaasumillu paaqqinninneq, nerisaqartitsinerit, nakorsaatinik nakutilliineq, perusersartarfeqarnermullu tunngassut ipeersaarnermilu pissutsit allat pitsaasumik eqqiluisaarnermi periutsit pissusissamisoornersut nakkutigissavai.

*Imm. 2.* Nunatsinni Nakorsaaneqarfiup peqqissaavinni, paaqqutarisarialinnullu angerlarsimaffinni il.il., atuarfinni, ulluuneranilu paaqqinnittarfinni, isertitsivinni assigisaannilu peqqinnissakkut pissutsit pillugit iliuusissanut ilitsersuutit suliaqarsinnaavoq.

*Imm. 3.* Ilitsersuutit angerlarsimaffinni suliffeqarfinnilu taaneqartuni nakkutiginninneq allaaserineqassaaq aammalu Nunatsinni Nakorsaaneqarfiup tamakkunani suliaqarsinnaavoq ilanngullugit.

**§ 12.** Nunatta Nakorsaanera inuit pineqartut misissuineq tunngavigalugu isumaqaruni inuit § 8-mi pineqartut arlaat sulinermini imminut inoqatiminulluunniit navianaateqartoq, imaluunniit sulinissaminut naleqqutinngilluinnarluniluunniit ilaannakortumik atorsinnaassuseqartoq, Nunatta Nakorsaanerata maleruagassat atuuttut naapertorlugit pineqartoq sulisinnaatitaanermut akuersissutaanik arsaarallarsinnaavaa taamaattoqarneralu oqartussaasunut atorfinitsitsisunut nalunaarutigalugu.

*Imm. 2.* Pissutsit imm. 1-mi pineqartut peqqinnissaqarfimmi sulisorisanut § 1, immik. 2 naapertorlugu sulisinnaatitaanermut akuersissummik peqartussaangitsunut atuukkaangata Nunatta Nakorsaanerata pissuseq oqartussaasumut atorfinitsitsisumut nalunaarutigissavaa suliap aalajangiiffigineqarnissaa inassuteqaatigalugu.

*Imm. 3.* Peqqinnissaqarfimmi sulisorisaq sulisinnaatitaanermut akuersissummik oqartussaasunit Kalaallit Nunaata avataaneersunit nalunaarutigineqarsimasunik arsaarneqarallarpas Nunatta Nakorsaanera pisussaavoq oqartussaasoq sulisinnaatitaanermut akuersissummik tunniussaqaarsimasoq arsaarinnikkallarnermik nalunaarfigissallugu.

**§ 13.** Nunatta Nakorsaanera misissuereernermi isumaqaruni § 7-mi pineqartut ilaat suliinnassaguni aalajangersimasumik piunissaqarfisariaqartoq, piunissaqaatit taamaattut Nunatsinni Nakorsaanerup aalajangersassavai.

*Imm. 2.* Nunatta Nakorsaanearfia pisussaavoq piunissaqaatit malinneqarnersut nakkutigissallugu. Taamaattorli Nunatta Nakorsaanearfiata nunap immikkoortuani eqqaaniluunniit aqutsisut isumaqatigiissuteqarfigineratigut najukkammik peqqinnissaqarfimmi atorfilimmit Nunatsinni Nakorsaanearfik ikiorlugu nakkutilliineq tamanna ingerlanneqarsinnaasoq.

*Imm. 3.* Aammattaaq Nunatta Nakorsaanearfia pisussaavoq piunissaqaatit aalajangersarneqarsimasut pisariaarussorineqarpata atorunnaarsissallugit.

*Imm. 4.* Piunissaqaatit inuit § 7-imi pineqartut arlaata piginnaatitaaffiinut sulineranullu allannguutiniq killilersuutinilluunniit kinguneqarpata, nunap immikkoortuani eqqaanilu pisortat allannguut piginnaatitaaffinulluunniit killiliineq pillugu nalunaarfigineqassapput. Peqqinnissakkut pisortatut sulisorisaq pineqarpat oqartussaasoq atorfinitsitsisoq nalunaarfigineqassaaq.

*Imm. 5.* Taamatuttaaq Nunatsinni Nakorsaanearfik pisussaavoq maleruagassat atuuttut naapertorlugit pissuseq pillugu oqartussaasutut atorfinitsitsisartoq ilisimatissallugu, Nunatsinni Nakorsaanearfimit piunissaqaatit malinneqanngippata.

*Imm. 6.* Peqqinnissaqarfimmi sulisoq oqartussaasunit Kalaallit Nunaata avataaniittunit sulisinnaatitaanermut akuersissummik tunineqarsimasoq, piunissaqaatinillu nalunaarfigineqarsimappat, sulisoq nunami peqqinnissaqarfianut uterpat oqartussaasoq taanna nalunaarfigineqassaaq. Nunatta Nakorsaanearfiata aamma nunani allani oqartussaasut sulisinnaatitaanermut akuersissummik tunniussisartut nalunaarfigisinnaavai.

**§ 14.** Nunatta Nakorsaanearfia isumaqaruni inuit § 7-imi pineqartut ilaat peqqinnissakkut sulinermini politiinit misissuiffigisariaqarluniluunniit suliassanngortittariaqartoq, tamanna pillugu politeeqarfik qaninnerpaaq qinnuigineqassaaq

*Imm. 2.* Nunatta Nakorsaaneqarfia isumaqaruni inuit § 7-imi pineqartut ilaat peqqinnissakkut sulinermini politiinit misissuiffigisariaqarluniluunniit suliassangortittariaqartoq, taannalu qallunaat nunaanniluunniit allamiut oqartussaasunit sulisinnaatitaanermut akuersissummik tunineqarsimappat, inassuteqaat pillugu oqartussasoq pineqartoq akuersissummik tunniussisimasoq taamatuttaaq nalunaarfigineqassaaq.

§ 15. Nunatsinni Nakorsaaneqarfik suliani peqqinnissakkut nakkutilliinermut attuumassuteqartuni, immikkut ilisimasaqarfigisariaqartuni oqartussaasunit immikkut ilisimasalinnik ikiortissarsiorsinnaavoq.

#### *Sulisinnaatitaanermut akuersissutit*

§ 16. Nunatsinni Nakorsaaneqarfik peqqissaasunut sulisinnaatitaanermut akuersissutinik tunniussisartuuvoq.

#### *Napparsimasut naammagittaalliutaannik suliat*

§ 17. Nunatsinni Nakorsaaneqarfiup suliat napparsimasut naammagittaalliutaannut tunngasut Napparsimasut Maalaarutaannik Aalajangiisartunut maleruagassat naapertorlugit tigussavai piareersarlugillu.

§ 18. Nunatsinni Nakorsaaneqarfiup makku suliaralugillu aalajangiiffigisassavai:

1) Peqqinnissamut tunngasuni atorfillit suliataat Napparsimasut Maalaarutaannik Aalajangiisartut susassaqrifiinut ilaatinneqanngitsut.

2) Peqqinnissaqarfimmi sulisut peqqinnissamut tunngasunik suliaqartut, taamaattorli Napparsimasut Maalaarutaannik Aalajangiisartunut susassaqrifiinut ilaanngitsut.

*Imm. 2* Nunatsinni Nakorsaaneqarfiup pisariaqartitsineq naapertorlugu qulakkiissavaa pissutsinik ilisimasalinnik pisup suliarineqarnerani ikiorteqarnissaq.

§ 19. Nunatsinni Nakorsaaneqarfiup nammineerluni sukkulluunniit peqqinnissaqarfimmi sulisut sulinerat pillugu suliassanik aallarniisinnaavoq.

§ 20. Nunatsinni Nakorsaaneq Tarnimikkut Napparsimasut Naammagittaalliortarfianni ilaasortaavoq, Nunatsinnilu Nakorsaaneqarfik allattoqarfittut atorineqarluni.

#### *Pinerluttoqarsimatillugu suliassat*

§ 21. Nunatsinni Nakorsaaneqarfiup pinerluttoqarsimatillugu iliuusissanik piumasaqaateqartatut politiillu pisortaat ikiorsissavaat Nunap Nakorsaaneqarfiata peqataanissaanik pisariaqartitsisoqartillugu.

*Imm. 2.* Ataatassarsiuisoqarnerani Nunatsinni Nakorsaaneqarfik meeqqap qanga naartuulerneranik nalunaaruteqartassaaq. Nunatsinni Nakorsaaneqarfiup pisariaqartitsineq naapertorlugu nalunaarusiani Retslægerådimit saqqummiussinnaavaa.

*Imm. 3.* Nunatsinni Nakorsaaneqarfiup politiit qamutinik motorilinnik ingerlatsisinnaanermik

uppernarsaatit pillugit suliaassani siunnersortassavai.

§ 22. Politiinit eqqartuusivimilluunniit qinnuigineqarnikkut Nunatta Nakorsaanerata imaluunniit peqqinnissaqarfimmi nakorsat piginnaatitaasut Nunatsinni Nakorsaaneqarfik sinnerlugu eqqartuussivinni suliaassat makku suliarisinnaavai:

- 1) Eqqartuussivik sinnerlugu toqungasut timaanik nakorsatut misissuineq inatsisini allani tamanna pillugu aalajangersakkat naapertorlugit.
- 2) Suliani nakuusernermut kinguaassiuutinullu tunngassutilinni inunnik misissuineq, inuit eqqarsartaatsimikkut pissusaat pillugit oqaaseqaateqarneq ilanngullugu.
- 3) Imigassartorsimaneq aamma/imal. nakorsaatitorsimaneq pillugit aalajangiiniarnermi aaversinnerit kiisalu tamatumunnga atatillugu nakorsatut misissuinerit.
- 4) Nammineersinnaajunnaarsitaaneq kiisalu timikkut eqqarsartaatsikkulluunniit akornuteqarneq pissutigalugit sinnisutut nakkutilliisoqarnissaq pillugu suliat pillugit misissuineq.
- 5) Ataataassarsiuinermi atugassanik misissugassanik tiguserit.

*Isumaginninnermut atatillugu peqqinnissaqarfimmi suliaassat*

§ 23. Nunatsinni Nakorsaaneqarfiup kommunit oqartussallu allat isumaginninnermut atatillugu peqqissutsikkut suliaassani siunnersuisortassavai.

§ 24. Nunatsinni Nakorsaaneqarfiup kommunini oqartussaasunut inunnut ataasiakkaanut tunngassutilinni periarfissat pisariaqassusiallu naapertorlugit isumaginninnermut atatillugu siunnersortassavai.

§ 25. Nunatta Nakorsaaneqarfia Naartuersittarneq pillugu isumalioqatigiit allattoqarfiattut inissisimavoq.

*Avatangiisini eqqiluisaarnernerlu pillugit sualiaassat*

§ 26. Nunatsinni Nakorsaaneqarfiup nappaatit tuniluuttartut atugaalersarneri tunillaassuuttarnerallu nakkutigissavai nappaatillu tuniluuttartut akiorneqarnerat pilersaarusoqataaffigissallugu.

§ 27. Nunatsinni Nakorsaaneqarfiup Kalaallit Nunaanni Nersutinut Nakorsaarfik Inuussutissalerinermullu Oqartussaarfik suleqatigalugit nappaatit inuussutissat aqutigalugit tuniluuttut, nappaatillu uumasuniit tuniluuttut pillugit innuttaasunut paasissutissiisarpoq.

§ 28. Nunatsinni Nakorsaaneqarfik Kalaallit Nunaanni Uumasunik Nakorsaarfik Inuussutissalerinermilu Oqartussaarfik suleqatigalugu pisariaqaraangat imatut pisoqartillugu oqaaseqaateqarlunilu tamanut ammasumik ilisimatitsissuteqartassaaq:

- 1) Inuussutissaleriffinni sulisorisanik nappaateqartoqartillugu inuussutissatigut tuniluussinnaasunik.
- 2) Nappaatit inuussutissanit pisut atugaappata nappaatilluunniit taamaattut pilersinnaanerit ilimagineqarpat.

*Imm. 2.* Nunatsinni Nakorsaaneqarfiup eqqiluisaarnikkut avatangiisitigullu pissutsit imm. 1. Naapertorlugit peqqissutsimut toqqaannartumik toqqaannangikkaluartumilluunniit annertuumik

pingaaruteqarsinnaasutut paasigunigit, oqartussaasoq pineqartoq ilisimatissavaa oqartussaasorlu siunnersussallugu pitsanngorsaatisanik iluarsiissutissanillu siunnersuutitalinnik.

§ 29. Nunatsinni Nakorsaaneqarfiup pisortat oqartussaasut, tamatumunnga ilanngullugit kommunit avatangiisinut, eqqiluisaarnermut, imermillu pissarsiniarnermut tunngatillugu peqqinnissakkut suliatigut nalinginnaasutigut siunnersortassavai.

#### *Suliassaqarfiit allat*

§ 30. Nunatsinni Nakorsaaneqarfiup ingerlaavartumik nappaatit tuniluuttartut nakutigalugillu ilisimatitsissutigisassavai aammalu peqqissuseq pillugu pissutsit allat inuiaqatigiinnut pingaaruteqartut, taamatullu peqqissuseq pillugu pissutsinik soqutiginaatilinnik nalunaaruteqartassalluni.

*Imm. 2.* Nunatsinni Nakorsaaneqarfiup peqqissutsimik nakkutilliinermut ilanngullugu suliassaqarfimmi iluani piffissaq aalajangersimasooq qaangiukkaangat peqqissuseq pillugu kisitsisitigut takussutissortassaaq. Peqqissuseq pillugu kisitsisitigut takussutissiat toqqorneqartarput, taamaalilluni nunami peqqissuseq pillugu ilisimasat attatiinnarneqassallutik.

§ 31. Nunatsinni Nakorsaaneqarfiup ajunaarnersuaqarnissamat sillimaniarneq nalinginnaasoq piareersaasioqataaaffigissavaa ajunaarnersuaqartillugulu qitiusumit peqqinnissaqarfimmi suliatigut ajunaarnersuaqartillugu aqutsineq kiisalu Namminersorlutik Oqartussat Sillimaniarneq pillugu ataatsimiititaliami peqataassalluni.

§ 32. Nunatta Nakorsaaneqarfia nalinginnaasumik innuttaasut peqqinnerulernissaannik pitsaaliuinermilu suliniutinut peqataavoq, pingaartumik qitiusumiit pilersaarusiornerni pingaarutilinni tamakkiinerusunilu. Nunatta Nakorsaanera qitiusumik pitsaaliuinermut ataatsimiititaliami ilaasortaavoq.

§ 33. Nunatsinni Nakorsaaneqarfiup ilisimatusarnikkut ileqqorissaarnissami ataatsimiititaliaq allattoqarfittut sullitaraa.

§ 34. Nalunaarut 15. juli 2017-imi atuutilerpoq.

*Imm. 2.* Tamatumunnga peqatigitillugu Peqqinnissakkut Nakkutilliisoqarfiup sulinera pillugu Namminersornerullutik Oqartussat nalunaarutaat nr. 1, 4. januar 1996-imeersoq - atorunnaarsinneqarpoq.

*Namminersorlutik Oqartussat, ulloq 15. juni 2017*

